

Let Me in this Ae Night

♩ = 100

O las - sie are ye sleep - in yet, Or are ye wauk - in, I wad wit, For
 loove has bound me hand and fitt, And I wad fain be in jo. O
 let me in this ae night, This ae, ae, — ae night; O
 let me in this ae night, And I'll no come back a - - gain, jo.

O lassie are ye sleepin yet,
 Or are ye waukin, I wad wit,
 For loove has bound me hand and fitt,
 And I wad fain be in jo.
 O let me in this ae night,
 This ae, ae, ae night;
 O let me in this ae night,
 And I'll no come back again, jo.

The morn it is the term-day,
 I maun awa, I canna stay,
 O pity me before I gae,
 And rise and let me in, jo.
 O let me in, &c.

The night it is baith cauld and weet,
 The morn it will be snaw and sleet,
 My shoon are frozen to my feet
 In standing here my lane, jo.
 O let me in, &c.

I am the laird o' Windy-wa's,
 I cam na here without a cause,
 And I hae gotten mony fa's
 In comin thro' the plain, jo.
 O let me in, &c.

"My father's walking in the street,
 My mither the chamber keys does keep.
 My chamber-door does chirp and cheep,
 I daur na let you in, jo.
 O gae your ways this ae night,
 This ae, ae, ae night;
 O gae your ways this ae night,
 For I daur na let you in, jo."

But I'll come stealing saftly in,
 And cannily mak little din;
 My fittstep-tread there's nane can ken
 For the sughin wind and rain, jo.
 O let me in, &c.

"Cast up the door unto the weet,
 Cast aff your shoon frae aff your feet;
 Syne to my chamber ye may creep,
 But ye maunna do't gain, jo."
 O leeze me on this ae night,
 This ae, ae, ae night;
 The joys we've had this ae night,
 Your chamber was within, jo!